

吳學士文集

吳學士文集卷二

番周梁肇煌檀園編訂  
全椒薛時雨慰農

嘉慶十四年元旦 恩詔聯珠十六首

臣聞五嶽四瀆爵眎夫三公諸侯名山大川功懋於出雲降雨  
是以省方畢而秩望陳翕河頌而時邁舉運昌福建皇華載四  
出之書道正脈通嘉饗酬百靈之祐

臣聞珠邱穀林考古直追夫軒頊殷墟周跡升高畧攬其範圍  
是以舉禮樂則興朝酌其損益報功德則祀典著于賽祈故發  
德音而崇三古之猷聿觀勳集攷祭法而肅百王之饗仍篤民  
依

臣聞眾言折諸聖六經倚刪述之功天子必有師百度本憲章

之志是以謁孔林則

列聖舉上儀修闕里則新綸咨大吏侍輦而觀古檜手植尙蔭  
夫宮牆遣官而薦芳椒心香遠歆於禮器

臣聞肺腑之戚濟美則官藩翰之良樂善是獎是以歲逢甲子  
而惇敘宴開星見丙丁而推恩道廣玉林長茂成名較十六族  
而繁水衡大開頒賞自十五齡以上

臣聞三雍具舉更老並尊一德旣符股肱同壽是以求舊篤則  
九列半高年依光邇則八旗多耆宿有猷有爲有守資於更事  
而道充杖鄉杖國杖朝預於延洪而賞懋

臣聞內外相維臺省與封圻同德文武並用訏謨與韜畧兼資  
是以

帝錄成勞九等早歸於朗照恩隆慶典一階普晉於昌時

臣聞燭微之照鑒及烏鳥之私教孝之仁慰其莪蒿之慕是以國多大慶芝泥疊賁於松楸官有新銜鳳誥特加於鴛鴦

臣聞儒以道得民經師人師專其事國爲時養器太學官學寬其期是故文部銓材登崇異於鄉校彤廷行慶休沐比於官司

臣聞春風布和枯蓼皆茁甘雨灑潤晚禾早成是故拔萃科定

十二年耆宿鮮後時之感明經歲貢數百士恩言有破格之榮

臣聞自芳之蘭藏於幽谷不改之竹郁於寒林是以下邑多曾

閔之行單門有松柏之心三沐三熏郡縣上之祠部匹夫匹婦

姓名彰於玉音

臣聞晴旭無私咸池先浴甘露所潤太蒙不遺是以七萃之承

恩較近九漠之向化匪遲故統內外臣而優其耄老合新舊附而表及期頤

臣聞脩滄棗栗孝養無方粟帛雞豚王政有備是以暮景之寒煥待人調盛世之溫飽惟

帝賜壯丁免役杖藜得捧衽之人令甲引年綽楔榮旌闔之字臣聞九種所宜坍塌易成棄壤七澤之潤波瀾乃損上腴是以潮汐所經無沃土沙石所積有逋租大澤涵濡舊賦胥從於核減新綸煦煦虛糧不困於追呼

臣聞天加膏於民不期其報聖貸潤於下不責其償是以九重一豫一遊已減正供額賦四海多稌多黍特蠲舊借口糧

臣聞物稟於命有厚薄補其缺者聖功材絀於數有榮枯彌其

憾者仁術是以

一人錫慶禾隴飲潤下之波萬類向榮黍谷吹回春之律

臣聞重熙之化隆則自新之途廣長生之休洽則胥匡之象成  
是以犴獄幾空善氣已徵於減等籬竿甫植歡聲相慶於更生

孝淑皇后梓宮奉安饗奠禮祭文

壺範思式璇閨鑄圖史之華懿歟克昭彤管溯珩璜之度閱星  
霜而同首聿申饗奠之文冀妥侑以齋心例舉奉安之禮惟  
孝淑皇后儷坤作則象月凝徽內職含章佐治緬分桐之日中  
宮正位承歡憶授璽之年勤穡稌於農功方春獻種具籩筐於  
蠶事入夏稱絲自杳雲駟載移星琯含懷九御記三霄環珮之  
聲餘戀六宮慕五采禕褕之色入椒庭而躑躅月掩瓊階經柘  
館以徘徊風披總帳太平吉地久諏日以經營鼓吹饒歌適慰  
靈於冥漠爰敷奠席告卽幽宮嗚呼福緒方長覘鬱蔥之佳氣  
德音未渺留婉順之芳型載肅几筵庶歆靈爽

恭擬三壇謝雨祝文

朕惟綏豐以圉萬國有命自天主敬而感百神得請於帝昨以  
麥秋應序穀雨逾期三農值長養之初四輔憂沾濡之晚靈壇  
已肅陳民莫而申虔粥廠未停迓天休而展賑特隆馨薦遍禱  
禋宗籲靈澤以升香豉甘霖於稅駕心齋夙夜果邀聰聽之符  
膚合崇朝遂卜歡聲之洽貽蕤在野溼穗欣榮播種連畦新英  
函活應恢台之盛節先協時和通肸蠭於精誠敢忘神佑申虔  
未已寅惕逾加載潔牲粢式酬壇壝伏冀庶徵咸若十日罔愆  
日時雨日時暘均符瑞應爲民祈爲民報式鑒隆儀



恭擬 勅建褒忠祠碑文

朕考之祭法曰以勞定國則祀之所以褒異勲臣矜式羣力也  
原任御前大臣太子太保領侍衛內大臣都統三等公額勒登  
保夙嫻武畧久在戎行昔事

皇考高宗純皇帝仰蒙鑒其忠勤資之禦侮自用師滇蜀暨臺  
灣廓爾喀疊經百戰兼戢三苗儋圭先朝通侯列爵朕恭承大  
寶肅討小慙俾典師干身先士卒冒霜雪閱寒暑七載戡綏三  
省圍謐實操勝算以協

廟謨朕用嘉焉策功晉秩載昇躬圭寵以宮銜彰示偉績勞臣  
盡瘁疾疾驟乘毗倚方殷大星已隕念其精白一心備嘗險阻  
中外知其清節朝野服其成勞晉封爲三等公特建專祠於地

安門外發帑庀材祠成賜名曰褒忠春秋牲牢著在祀典嗚呼  
鼓鼙永靜將帥之績可思俎豆長新山河之氣益壯用書鴻業  
播於貞珉億萬斯年光茲榮寵

恭擬 勅建御前大臣太子太保領侍衛內大臣都統三等公  
額勒登保碑文

朕惟酬庸典重桓圭旌表海之勞蕩寇勳成貞石紀珉山之業  
惟載定同功於一德斯褒崇垂典於千秋用煥豐碑載頒隆綽  
爾御前大臣太子太保領侍衛內大臣都統三等公額勒登保  
系承襲鄂爾琿孫吳素絲早矢於初心丹甲克符平勝算自蜀  
州載旆始賦從戎迨演海歌饒旋陪宿衛陳師石堡攀鳥道以  
摧堅出坎銀濤渡虎門而剿叛洎洗兵於後藏雁塞名馳曾儋  
爵於先朝龍光寵大服勞藩邸小心陪銀槩之班揚武巖疆大  
帥受金甌之寄承

廟算而旌旗色動先靖三苗統師干而壁壘歡騰疊經百戰偶

遲露板耿弁垂翼於澗池終掃星槍李晟作屏於唐室殲凶渠  
以衛善萬戶回春淨逋藪以伸威五常陳夏飲冰式眾兼猷爲  
守而能鼓戰心作雨銷塵合秦楚蜀而永歌安堵壯猶克懋賁  
寵宜優通侯膺列土之封上將領近臣之隊榮施冠服翠羽騰  
輝功在馳驅紫纒照路著鞭鶴禁寬筋力於勞臣操管麟臺錄  
寵猷於信史前星地峻特與宮銜後扈光臨將隨蹕路嗟疆場  
之力瘁疾易乘值

陵寢之禮成褒封先晉佩囊解賜股肱念一體之休食物馳頒  
甘脆冀加餐之報驟聞溘逝彌軫公忠悼深而涕集郵籤功大  
而恩先經被家無私蓄八紘知清白之衷國有常經百尺畫丹  
青之像命親藩而致祭頒內帑以治喪度地建祠筮辰撫奠封

樹慰松楸之慕爲遂烏私絲綸榮襁褓之遺俾光燕翼戎經致  
果輯宇能共痼癘素履懷清起家無慚夙夜考易名之典抒軫  
舊之懷表其德功諡曰忠毅嗚呼分茅世職子舍肇錫以嘉名  
懸臬官常碑林永光夫令典欽茲休命貽爾後昆

爲衍聖公謝 勅修闕里廟堂表

欽惟我

皇上性協生安功兼作述建

皇極以錫民極絜道統治統之綱用大中以契時中承見知聞  
知之運詠左氏則詩成兩卷傳心直貫乎麟經本孟子而寵賁  
四言賜額已光於鳳德羹牆如接宮牆廡異代之思絲竹猶存  
絲綸荷殊恩之逮俯念諸生習禮之地曾停

列聖訪道之輿宜肅觀瞻特咨修葺詔水衡而發帑命疆吏以  
鳩工事系乎右文典隆於繩武昨者奏俞柏府僅請顏巷之庀  
材今茲光被杏壇正值虞琴之播煦卽見虹霓迴帶欣逢輪奐  
一新在臣家已極稽古之榮而海宇同感崇儒之澤

臣業荒肯

構訓凜循牆早瞻化日於槐階勉守清風於檜蔭肆門業於藏  
經之塾丹雘雲新景寶翰於問禮之庭紫宮天咫崇依壽宇周  
千億萬齡而楓陞長瞻和飲恩暉合八十七世而葵枕同向

代朱師謝壬戌正月謁 陵賜所過地方棉衣免地丁十分之  
三並減文安額賦表

欽惟我

皇上德峻堯思孝隆舜慕宮庭恩重露淒倍篤於三替

陵寢禮成風惠爭歌夫一豫頒新祺而行慶紹衣賜衣按舊額  
以施仁蠲賦減賦軫餘寒於輦轂絲言踰令甲之常寬正供於  
郊圻蹕路阜租丁之力固已青旂揚煦依日御而知溫赤縣登  
熙拱辰居而藏富別有近畿之瘠土實當大澤之下流河衝易  
浸及田廬潦集亦傷於耕穫文謨曾賁已籌補揀之全大吏未  
陳早下諏詢之令繼志莫先於布愷春臺播時雨之甘省賦不  
後於加膏秋稅依慶雲之例兩年秭秭久荷蠲舒萬井隄防仍



咨疏鑿用能嘉孚駿惠善溢禋歆挾纘歡騰元旦聞六師之捷  
升壇氣霽上辛綏九土之豐臣等依暄若木食德維桑先垓埏  
瞻衣被之光偕父老歌哺含之樂已卜惠心協吉保和綿億載  
之基卽看大凱告成肆德篤

五陵之祐

代鐵師謝 賜御製集石鼓文製鼓重刻序重排石鼓文及石  
鼓文墨刻表

欽惟我

皇上萬壽作人八徵好學攷古王之令典集前聖之大成元音  
旣播以金鐘奇字重排於石鼓在昔中興校武從臣上羽獵之  
篇迄今太學觀文多士慰切磋之願自雅才旣遠古篆難詳幾  
疑史籀之文近出宇文之代三百篇不入羲娥有未摺之文章  
數千年以來蝌蚪乃僅存之典物雖依文爲訓元潘迪附勒明  
詮而考古能詳唐韓愈首推博辨有其識而無其力神物徒系  
以長歌晦於古而著於今元運實需夫

神聖我

皇上膺寶籙而右文握鴻圖而訂古值邳治懋勤之暇正奇跡  
顯應之時旣徵典而作辟靡復考文而搜石碣字排羣玉留剝  
蝕於風雨之餘書勒貞珉仰光華於日星而上

天章巍煥配夏后衡嶽之碑法物穹窿軼周官韞人之式況乎  
上都並置興京逢興學之辰兼以秋獮親臨瀋陽邁岐陽之盛  
奴才效能世僕守職憲司欣逢化洽膠庠願奉無刑之治快覩  
文頒琰琬欽承有典之詞誦詩而莫測旨深捧賜而惟知恩重

代鐵師奉 勅編錄八旗詩進呈表

伏以神臯祥發羣材分川嶽之靈壽宇文同七萃衍詩書之澤  
包垓埏而鼓舞泳德咸符沐日月而遵游依光自近蔭成喬木  
綿拱衛於億齡業在名山普裁成於眾製觀風典鉅化雨恩隆  
臣誠惶誠恐稽首頓首上言竊惟書成汗竹代有篇章雅美飴  
茶是鍾靈淑丹陵若水隩區誕聖之鄉夏諺幽風福地歌勤之  
什臯颺禹拜產竝近於姚墟棠芾桃蕢句徧傳於陝治然而八  
元八愷起自名家汝鳩汝方收之敵國並值龍興而佐命未偕  
鳳翽以矢音降自羸劉誰爲周召或馳驅草野著作未遑或翊  
贊軒墀謳吟遂廢迨乎太平旣久大雅聿興輶軒徧於八方庠  
序深於六義而詩陳寶鼎非沛上之英客滿瀛洲無晉陽之產

步集 卷二  
極之萋苴周恪杞梓楚材胥入網羅咸陪奔奏論勳宿衛詞詎  
炳乎丹青盡瘁前驅技且窮於病競未聞吹漁邇化並附歌薰  
鼓吹從征且能肄雅近則振振麟角道備親賢疏則赳赳虎賁  
才兼文武壁府煥周廬之彩光與星輝戟門聯幽谷之芳章依  
漢倬有若今日之盛者也欽惟

皇帝陛下禹文敷海舜治從風政在養民暘雨錫蘿圖之福事  
必稽古圖書承麟紋之傳七德綏而秦蜀氛清大經先正一心  
盡而衛漳波靖育說胥芟嗣幸院於九年干支竝叶續藏書於  
四庫山海兼包悉遵家法以觀文遂協

天心之佑

聖九夏譜由庚之樂弦誦達於瀛壖六軍騰脫甲之歡詠歌洋

於桂楯天潢櫛學柏梁聯燕喜之篇卿月承猷槐位協鳳儀之  
瑞合官學宗學而造士子弟知書胥同姓異姓以與賢春秋上  
計惟此八旗之臣庶全憑

列聖之生成初則數取三單繼則名符八陣色分鑲正中軍奉  
黃屋之威考列源流太府藏丹書之籍鴨江派近從征旣盟以  
河山鴻澤居安先附亦隸於臣僕駐防兼內外居行儲武庫之  
兵胥宇其憂歡賞卹費水衡之幣戰餉守餉養成禦侮之才世  
祿世官榮與登科之選持戟嚴更之署親瞻舞羽於堯階釋冰  
壁水之門飽聽論鐘於周圍置官師而立教示以大防觀禮樂  
而宣和導之善氣溯二十一家之紀載文德誰同合百六十載  
之甄陶雅才竝起惟國恩浹於禁旅食德能言況

御集頒在儒林修辭有式雖聯珠合璧戒祥瑞於勿言而東壁  
西清許咸韶以其聽本支貴戚家有賜書一介單門人多專集  
幸作

皇朝義樸爭鳴盛於止戈非無帝世巢由亦效忠於擊壤值重  
熙之慶典各獻篇章歌三輔之新恩有碑紀載竹匏駢奏梨棗  
漸多叩鐘分大小之鳴吹律異陰陽之應將門貴其多藝儒塾  
傳以專長未經藻鑒之刪存每慮眾言之紛雜臣授書束髮觀  
俗乘輅徧求國雅之愜心益覽土音之悅耳古詩人之遺韻近  
在枌榆鄉先達之大篇多存篋笥集裘未遂辟蠹恐疏竊念河  
嶽英靈向多彙選齊魯文學今有專鈔況茲旗籍之簪紳幸傍  
羽林之部署先澤倚邦家之芘曾附風雲大旨貴忠孝之言敢

誇月露臣久思廣集未敢上聞輒從述職之餘敬有採詩之請  
宸聰兼聽

帝志旁求俯鑒鑽研親承指示臣粗知下學深昧別裁搜玉有  
年揀金無識重蒙九重之燭照命資眾志以城成有待編摩先  
加鈔撮溯自作山伊始文物已肇於興京暨乎定鼎大同人才  
倍隆於化宇體展親之義首列宗英誌翊運之榮次登朝彥或  
後先憑諸仕版百官之表可稽或分合視其科名千佛之經全  
列白駒音遠山林有自逸之身亦管微明闡閣多可存之句幽  
潛均錄位號畧詳述作竝注於行閒篇章悉收諸身後單詞亦  
採羣雅畢陳名或因詩而存言不以人而廢幸觀成於眾手自  
比抱殘雖就正於同官終慚示璞疆圻寄重敢誇小臣求牧之



心洙泗源通敬繹至聖刪詩之筆伏願幾餘鏡秉論定衡懸集  
金聲玉振之大成操六變九流之總轄曰貢俗曰見志經鑒定  
而風雅道存或旨縛或文繁奉品題而源流理匯寵頒

御序小言附二典之魏榮錫嘉名故紙賁三都之麗譬諸芝莖  
麥穗邁

皇風而史乘畢登庶幾玉海珠林邀乙覽而儒宗益貴

臣學荒

掛壁識蔽正牆聞滄浪而詎解辨聲遇鐔子而不能索響慕昔  
人之敬梓幸邇典型效童子之歌衢敢忘諷誦紬書石室三寫  
愁似豕之譌訪籍金臺羣言惜維魚之蝕勉收散佚思廣流傳  
既奉絲言仍慚舉一復三之悟果叨車指得窺襲六爲七之原  
從此曰雅曰頌曰風後四始而播諸金石立言立功立德先九

州而錫以章相世僕承恩永戴  
君師之教皇輿鞏吉長延詩禮之祥

代鐵師謝<sub>二</sub>御製八旗詩集序表

仰維我

皇上神樞成化心矩敷言承家法而鞏金湯藝先騎射觀天文而章雲漢洽洽謳吟惟茲七萃之勁兵近備億齡之世僕羽林星衛稟

廟算而奏效止戈璧沼風從歌國恩而嗣聲論鼓雅言教立人知忠愛之陳通志書成

帝許藝文之載錫名拜寵存其詩益重其人製序覃精採其本不逐其末道隆彰輝著人心風俗之綱維化洽生成溯

祖德

考恩之培養文期載道貴纖靡之畢刪職在宣勞尚公忠之同

勵臣學疏四始道景三雍奉

聖謨知雅頌之音繹

天語思艱難之業獎及搜羅之富受寵益驚示以期望之深酬  
知敢懈編摩有幸得窺昭代典章文武兼資請告熙朝臣僕荷  
甄陶於

列聖世澤能言遵準獲於吾

皇天章共仰詠歌不廢宜歸奏雅之程弓矢自櫜莫負習勞之  
訓邇者兩階敷德羣孽胥殲四隩綏豐大河永靖薌升夏至八  
風符十稔之占澤繼春膏十雨慰三壇之請神京日近騰歡聞  
擊壤之聲上塞雲高講武裕干城之用謳歌益盛合億萬方同  
頌嘉祥喜起攸符超三百篇更陳大樂

高宗實錄告成議敘謝表

我

皇上祗德承基孝思錫類洗兵功歲蕩平慰眇捷之殷亮采箴  
懸兢業踐習勤之舊傳心軒畫紬寶訓於宮中續緒文謨受成  
書於柱下欽惟

高宗純皇帝咸登極建蟠際恩同書七閣而功紀十全德四得  
而疇兼五福孚惠亙六十載之久訓政更益以三年受圖拓二  
萬里之遙傳器克酬乎初願

皇上念恩授璽協揆垂衣開石渠而觀堯典舜典之編膺寶籙  
而通實政實心之契錫垓埏之極

帝範式陳詔記注之司

皇猷具在畫天續日技窮於窺管捫槃伸紙吮毫心切於手胝口沫編摩未學恐史例之易疎挂漏方憂實臣心之多疚仰維聖誠訢合喻旨高深

睿覽精詳隨時刊正臣等幸從舉一復三之後與窺襲六爲七之全集眾手以觀成詎微勞之足錄乃自闕軒經館授簡詞垣甫窺秘府之春秋卽沐天家之雨露水衡帑發厚月餼以寵駕行金匱春溫較歲支而增獸炭輕羅細葛上珍偕賜扇同來甘果鮮瓜貢品繼頒冰而至免道旁之鵠立地已親而更與寬閒聞天上之鸞頒書未畢而再蒙甄敘茲值編校之功已竟紅黃之本亦全吉日風祥重霄雲渥在事者澤同乎存歿拜寵者分治於崇卑西閣書陳東瀛氣煦紫纒賁彩上賞竊奉以馳驅黃

賀 御書殿額表

欽惟我

皇上心傳精一性協生安與時偕行彰信絜剛柔之總秉文之德緝熙賅繼述之全侍訓政者三年養以天下慶歲功於三省吉在師中躬節儉以清治源詔頒卻貢綏豐亨而寬民力利溥蠲租法駕秋田練武肅遵乎家法講筵春御析微厯闡夫經心詣

南北郊而精意先歆和甘召澤謁

東西陵而孝思永錫堂構綿庥廣閣延謀總內臣外臣於

睿鑒深宮求莫厯一口二日以勤求凡茲大政之敷施悉本

皇衷之劬茲靈臺柏偃尙秉燭於宵衣御藉禾登方投籤於曉

漏從容中道兢業皆率性之誠宥密軍心治平切履豐之懼更念殿廷之所署實爲訓迪之攸憑義若列眉總堯勳舜華而繪之隻字道存觸目合君咨臣儆而約以兩言載布

天章上疏

聖義因心作則探勝欲勝怠之源居敬臨民執求治求安之要加審察爲萬幾樞轄彰厥有常藉提撕爲六典權衡所其無逸覽百王之陳迹叢脞尤慨夫前朝導庶尹以交修清明必根於內定朝乾夕惕本陟降庭而益勵成功身體力行合

先後聖而並徵盛軌推諸庶民執業胥歸習勤儆逸之程因之八表延禧均收加勞勛勤之儆貞珉旣勒大文若日月經天聖宇同遊至道如江河澤物

臣等

心慚瘵職責與宣猷幸九重



自裕經綸俾百職得資渠獲趨彤墀而瞻額敢忘  
聖訓之諄捧寶翰而服膺益慶新猷之懋雖高深莫測未能操  
短量長而敬怠攸懸庶幾藉勤補拙奉此探本窮源之論固已  
襲六籍爲七經昭茲懸旌馭朽之衷亦且歷萬齡如一日

謝授右春坊右庶子表

竊臣江介庸材詞垣後進彤廷校藝遷官驟陟清班金匱紬書  
議敘再居高等近龍光於日講仙室春隣扈豹尾於時巡行宮  
晝接蓬山分韻叨御讌而賡詩華陞承恩值賓興而選士凡茲  
寵榮之踰分均非夢寐所敢期茲復仰奉綸言洊升宮庶廁春  
華之妙選樛櫟多慚分東觀之餘輝涓埃莫報著錄未窺於學  
海悚惶益切於戴山臣惟有砥礪儒修恪勤史職以期仰報  
高厚隆施於萬一

御製十全老人之寶說恭跋

臣聞堯德廣運惟四舜大功有二十禹無聞然者六伊古聖人  
亮天熙績純純常常舉其大端可概而述也欽惟我

皇上德凝五福功隆十全邁八帝之延洪廓四極之聲教超鑠  
萬古獨膺

天篤大順大備豈可以數紀而量測者哉臣伏讀

御製十全老人之寶說仰窺

皇上巍煥不與之

聖心竊謂三郊精禋雩霖響應開先不違自我視聽則事天之  
全誠也省山肇基紹庭繩武顯承謨烈八旬敬慕則繼志之全  
孝也篤敘功宗本支千億五世一堂燕貽蕃錫則親親之全仁

也闢門疇吞鏡照萬里彰輝執中乾綱坤紀則御臣之全明也  
四蠲正供賑發無算奠海翁河思艱宵旰則勤民之全惠也恩  
科十二耆英千叟璧離圓橋麟郊鳳敷則教育之全澤也詩文  
萬袞淵源七閣石鼓石經崇論廣說則文德之全富也闢疆海  
西洗兵天外佛土咸皈金瓶世賚則武功之全靖也八徵用念  
九疇用嚮期頤懋勤萬齡天貺則福壽之全臻也四知惟幾四  
得惟德謙謙有光乾乾不息則心學之全純也遽數悉數掛一  
漏萬日新又新光華旦旦蓋一日二日萬幾五十八年以來至  
於萬年無極也天全乎大圓而九重十端不足以測天地全乎  
大輿而九土十形不足以量地

聖全乎大德而九如十有億兆京咳不足以紀

聖也惟精惟一惟日孜孜

皇哉

聖哉

皇哉

天哉

御製說經古文恭啟

欽惟我

皇上極會箕疇象觀義畫祈

天永命答

帝謂則布誥明堂率

祖攸行陳家法則藏書太室單心亙六十年之久蘊爲道德發  
爲文章眎掌拓二萬里而遙武有事勳文有典訓乘一日二日  
之幾暇先功德而後立言合治統道統爲全書以堯舜而兼孔  
子編以二集傳之億年固已囊括苞符張皇奧窔惟

聖意謂保邦大法莫詳於六籍之文允太學取說經鉅篇特勒  
於諸碑之首或講筵春仲宣精一於明廷或秘閣宵分刊紛紜

之讐說別於眾製揭日月而齊明作爲一經後詩書而同壽臣  
垂髻就傳粗窺鄭賈之箋發篋求師專據程朱之詁竊以積之  
充棟沿譌奚當於傳薪作者專門探秘未烱於觀火固顓愚之  
多昧亦前說之未詳且舊解之因仍鮮要言之絡繹茲何幸觀  
我

皇上貫一十有三經之旨爲百四十四篇之文薰錄一通盥吟  
萬徧理則布帛菽粟詞則星宿義娥若震聾而發響韶咸如潤  
渴而逢源左右植根性道得聞夫子之文啟籥心知真見大人  
之學閒嘗字梳而句櫛愈覺經合而綸分大抵傳異詞而真漸  
漓家爲說而錯益甚

皇上生知好學聖睿通微謂享上帝懷諸侯均在敬德而不以

器也一人豈摺而兼執大圭鎮圭之制無考於太常五瑞圖班而復留圖缺斜映之圖下同於贗鼎周公非眞夢也刪讒語而契行道之忱韶樂圖待學乎放淫聲而切颺言之慕臣民視乎主德闡蒼生從乂之源和一屬之君心彰元聖責難之隱子貢非陶朱之輩貨殖是謂利仁顏淵兼曾子之功知十如唯一貫義制禮制卽事卽心則久則悠是二是一春蒐秋獮晒場地之非耕渭濁涇清何別流之聚訟雅頌正聲而援以俗載育之舊譜宜翻淮徐梗化而目以戎夏侯之支詞可廢牛風順而馬風逆謂牝牡相誘者非雞稱牝而狐稱雄比鳥鼠同穴者妄完廩浚井非大杖則走之義斷其必無分晉移齊非與國同戚之心知爲僞托麋與鹿均解於夏惟麋則在深冬田與戰不可以車



善射豈皆君子此千古相承之誤資於

御論而刊者也其有引而未發語皆不詳三古而還百世以俟  
皇上應運而啟其覆迎機而折其衷敬大臣者敬其職非敬其  
人考終命者終其事非終其壽無五極而有一極建極時切憂  
勤泰九三而乾九三保泰必先惕厲斂福侈陳百順當敘五倫  
絜矩詎揣八方先通一貫幾訓心不訓事未事操應變之權安  
言意非言身惟意係閑邪之紐無自欺卽正心之學心與意非  
兩端惟時亮亦爲君之箴君與臣原一體先難後獲全於克己  
復禮之功時行物生發於知命耳順之後非震入於弛非異隣  
於躁兼順動以无疆無山憂其洩無水慮其枯互仁智以相用  
探樂之本在志武美韶善不假費辭揭天之權寄人傾覆栽培

都如操券不息則久參觀而會乾爻不敬奈何片言而包召誥不逆億乃自誠之明無適莫卽允中之執四時遞嬗惟其無恆是以有恆百姓可懷常若不足所以與足一者徹上下以行九經時者貫古今用咨羣牧補天地之憾正在養賢闢視聽之門必先觀我摅舜禹以疏不與之義定句讀而先憂之理通知洙泗無得天下之心核分際而亞聖之名定此則羣聖未傳之蘊資於

御論而宣者也若夫古近異宜經權分軌

皇上懸鏡水之明削駢支之說謂公尸不可復比於井田謂像設似可從何以木主五更者更事之謂謬解不取蔡邕三老者無告之民神悟適符孟子上下經發明健順咸恤不徒象夫婦

之倫春秋書歸統姬周王正即可推封建之弊楚子有三失城  
濮不專罪得臣左氏多過辭季文何獨寬襄仲假途滅虢之事  
信左公穀不如經文關雎王化之原信齊魯韓不如論語忠恕  
非假借之語已實括夫萬殊唐虞有授受之言不必具於二典  
書序非宣尼所作糾正特詳史論拾盧仝之餘吹求太甚魏徵  
暨韓范強諫亦和比干與段顏捨身亦哲知龍蛇之戒禍不得  
蒙妬美之名用官禮而誤人爲昧於先幾之慮此千秋未定之  
案資於

御論而斷者也若夫事繫大經辨淆岐說歸有光疑易圖晚出  
非古帝之書王應麟謂敬仲初來卽有齊之兆詎能照幽燭秉  
解惑犀分

皇上謂德禮之內有政刑謂誠明之外無性教元與始罔二義德與政是一原封人華祝此外無稱天子爲聖人之文素王刪詩當時無降宗周爲王國之理禍福視其自取蔡沈之說未詳威愛必當並行高啟之論已隘盡其職自不越職官司豈僅愼思無其器並無其人十筮竟可勿論地在水上卽天在水下知需雲元氣之周山藪藏疾似川澤納汙明坤慈萬物之母王弼以梯爲楊之秀不如朱說作梯而訓爲根康成改於爲迂其身不知身篆類子爲子其子諧孝卽仁烝又卽義是謂安行堯之於變舜之允諧何殊性習與子之天不可恃而況與賢以賢之法不可渝豈曰以長此諸儒未解之感資於

御論而開者也抑更有進焉者堯典舜典卽紀當日之勲禮經

孝經必俟躬行之實五德以降非無竹帛而盡托空言六帝之中間有文詞而不臻上理惟我

皇上八徵時念而八弊胥除十全允臻而十功並建治爲唐虞三代之治文兼詩書六藝之文

臣謹按

御製經說以徵諸盛德鴻猷節合逢源可得陳其萬一也皇上謂天較聖爲近希天卽希聖之歸民去天非遙敬天卽敬民之始故於天行健三致意焉用是

郊壇親肅薦一德之馨香征撫順施法四時之遲速是敬

天之精誠與

御論相符也我

皇上繹律呂之義承宗樂正之編格陟降于庭繼志君難之訓

非鋪陳夫謨烈蓋自勵於率由用是六巡駐輦繩

祖武於春行八月疆劉遵舊章於秋駕謁

崇陵而詩輯誦實錄而書成此法

祖之作述與

御論相符也我

皇上以人不易知事有由敘鄭重於屢省之成謂玩愒紛更之  
弊當盡去推本於不費之惠謂墾闢積儲之利不易興用是毫  
期教戒勵封疆以實力之爲下吏朝宗慎牧長於大廷之簡章  
皆親批之諾刑必自協於中河防順利以節宣鹽法因時而斂  
散是勤政之孜孜與

御論相符也我

皇上誦菽粟水火之句繫懷生齒之繁疏裁成輔相之文軫念  
豐荒之省謂惠惟勿問前說相承謂利必不言仁心乃廣用是  
偏災暫告上勤宵旰深衷萬壽覃恩疊詔正供全免民有獲圖  
之理君無不思之艱是愛民之矻矻與

御論相符也況乎尋源探本五福之頌作焉公寰宇之康圖福  
壽而好德責之九重循名核實四海之論續焉述利賴於天地  
祖宗而敬修公之四海緝光永繼問學方新億算無疆發揮未  
艾久其道而天下化載道於文聖不言而治功成立言爲則經  
天緯地誰摹山河日月之全大經中經非惟金馬石渠之室

御製秘殿珠林石渠寶笈序恭跋

代

欽惟我

皇上四德承

天十全靖宇乾坤在宥觀義畫於靈囊陽雨若徵衍禹疇於中  
極詩成五集振三百篇樂府之聲戰啟六圖拓二萬里地輿之  
景

聖壽重周甲子軒錄增書

皇衷首念耕桑豳風續繪閒因宵旰萬幾之暇博覽詩書六藝  
之文嘉惠士林取精學府輯之緩成之速爲之在人待其會與  
其時作者謂

聖仿埏泥爲活字冠以宸章詔勒石以諸經頒諸太學總古今



而蒼萃循竹素以鋪陳舉萬一其未能補五三之未備者也邇者啟石室之大成覽金繩之秘篆由旬紺碧都成珠鏡之緣脈望圓明遠耀圖書之府匠心所寄筆陣尤張藻鑑曾經墨賓長護頰貝葉芝苗爲鉅帙例在前編集書斷畫史之大成師承先事溯舊臣之排玉藏縑已四十餘年逢慶典而獻琛發篋溢三千之界固已總持乘載輝潤猶縑矣況乎

聖治雲昭

皇言海富模天范日藻嶽續川宜續一代之書奉爲億年之寶重踰禹刻新邁湯盤而臣敬誦序言微窺淵旨猶謂事瀕於玩物不如志一於勤民信虔輦之至誠仰勞謙之

聖度器非求舊藝亦可游竊窺二集之大凡首重三朝之寶翰

瑤編補入隻字比於心傳石墨全收寸楮儼乎手澤此與上下中述事之作均關陟降庭繼序之思實

上聖之紹衣異羣儒之集古若夫平戎立學碑版親揮唐絹宋絲林亭閒仿或戒先黷武或事美育材肇寔降題額大書河伯雨師之廟排石列讀經諸說摺圭卜筮之篇理並合乎神人義盡根於典禮一幅安牖之雨抗想春農八年錦樹之陰縈心

具脊此

御製書畫之均係政與民者也雲煙過眼龍遊跋尾之書文章有神妙啟更端之論顏魯公寫哀之藁足驗民艱宋孝宗論賑之言旁參荒政從鐘非寶勒銘厪

聖主之心禊帖誠佳摹本出藎臣之手待飼得飼教保赤於丹

青耕圖織圖飭求衣於稼穡寶笈皮平夷之卷非誇賞鑒之精  
綸言協開泰之爻獨信艱貞之吉此

御題古人書畫之均係政與民者也瀛洲春色幸依日月之光  
畫續冬官小作元黃之體自叨一顧便與千秋煥北關之標題  
極西清之寵遇書張齡之賦意本有餘錄韓愈之歌學能通古  
宗臣寫香山之會事與養老相符妙手鐫積石之圖詩爲治河  
而作繪祝釐於升日不忘徧德夫羣黎資解慍以薰風增勛惕  
衷於五夜此

御題諸臣書畫之均係政與民者也蓋惟一日二日之懋建居  
高聽卑是用八法六法之搜羅卽小見大岱收地負指僂不勝  
霞布風行管窺何逮玉堂清閣緬懷蘆荀之林金璫琳琅夢想

瑯環之洞源流尙昧掛漏知多參綜人天阿僧祇同瞻壽相包  
含德藝四庫外更有全書

御製兵部奏凱旋兵丁至京由驛各歸本地營伍紀事恭跋

代

欽惟我

皇上巍功十全勁旅所向我武維揚將受成於朝而無中制之  
事民資衛於兵而不知供億之繁卽今平廓爾喀七戰七捷重  
威撫和仁治道豐蓋史籍所罕覩矣

臣伏讀

御製紀事大哉

聖言廟堂制勝之道國家任官之法與軍行之肅吏治之釐均  
可觀焉三五以降戎政不修發及謫吏謫民謫戍逮七科謫而  
兵益敝搏翼擇肉恹恹黔首往則殲焉毆不練之卒不可以師  
我朝恢宇振聲專用禁旅入列鈎陳之衛出絕大漠東省旗兵  
世食

皇朝詩集卷二  
帝德旣飽而歌

皇上恪遵家法習勞勛勤歲舉秋獮帥羣藩陳輕騎徑峻厲水  
搏豺搃驅收禽論功勞逸必齊筋力習於險隘耳目一於賞罰  
襲者八功著有成效茲復靖藏微奪卞轟凋軒磴區陬八靈震  
懾黃教奠安日未一紀此制勝之道凌轡千古也明之中葉武  
備苦窳迫於末季專倚本兵選懦闕冗負重致覆束縛馳驟邊  
帥掣肘馬瘡車隊國瘁以殄易曰在師中吉无咎言人臣之義  
無所敢專惟於師則必竟其智勇而兼用威和也

皇上神武天授志先氣充蟠際垓塹剖乾符合靈契命將授機  
批卻中肯夏官之長奉行成例每遇設驛頓兵之事奏請聞  
旨有麟閣之與圖無虎節之遙制廓爾喀之克功成操券中外

同德將佐奮功罔有牽掣是用蕩險受降旗不再麾澤平遐荒  
既畏且懷豈有南省擅命居中魁柄者哉此又任官之法遵軼  
百王也餉者三軍之命也粵稽前史國貧政敝仰之藩鎮假諸  
義倉師飽無時六軍所過叫囂隳突勝兵恃功奪及閭閻師出  
不律民昭且劾

皇上恩行法立大官用命委積豫車馬駛饋運達踰二萬里桓  
桓虎旅超越青海雷動西域塞門之內芻茭不驚昔往今來如  
行衽席至於同仇之誼壺飧致犒勞枵杜而峙糗糧取不傷廉  
予不傷惠則軍行之肅而吏治之釐皆由我

皇上智燭邇遯而德被臣黎也夫豈鰥生之見所能窺於大方  
哉不黷武而武成不佳兵而兵克承

吳絳而啟奕業保受威命明德於億萬斯年矣



諭楚黔巴蜀諸苗檄

告楚黔巴蜀諸苗我

太上皇帝臨御六十年膺景命之重申獲寶祚之宏延覃德施於遠邇包坤輿而無偏夫甘霽時降禾稼順成不能語沾濡之恩也大川旁瀆溝洫充牣不知明江漢之源也源遠者莫測恩大者不言況乎去堂階者幾萬里若處九淵之下而瞻天汝烏知帡覆之無外道兼乎生全哉

聖人之誠默契渾元曰以德不以器蓋精意以享禋就其迹而陳之亦事詳乎質文四郊升香蠲饘躬親首祈嘉穀典重上辛  
圜丘

方澤二至敬申四月常雩珪璧載陳製樂章而元衣升歌有大

雩之禮在惟至誠之感符獲霖雨之下逮閱五紀而僅一舉荷天心之仁愛歲歲和甘達乎中外汝知力田之逢年實

聖敬之所沾漑哉歸政期近一周中祀總祭典而致虔每齋宮之先蒞初不改乎此度裕寸衷之劼毖八旬有六升降拜跪曾無假於扶將閱耄期而一致周甲改元

嗣子秉珪乃膏澤之偶屯仍詣壇而躬祈蓋

太上皇帝之爲民請命也至於今日而敬益躋若夫紹世德而守家法更爲汝詳言之我國家之肇興東土也朱果兆其祥天女履其跡惟

蒼昊之歸心十三甲而無敵值明運之旣冬憫蒼生而拯溺思王業之艱難捧文武之方策誦

太宗之名箴樹箭亭而碑勒衣服語言毋忘開闢曰騎曰射以時學習曰不加賦

仁祖舊章

皇考丕承定賦減糧率由不愆取民有章用是黔黎樂利以裕及汝猗猗不取汝賦長汝子孫六十寒暑至誠悠久仁宇壽宇曰勤政殿

先皇有額曰爲君難

皇考是則誦實錄於昧爽歲同環而絡繹二十五而龍飛踰八旬而無斁堂曰紀恩

聖祖卓識比古公之知昌且大小之懸絕福將過我射熊山莊溫語親誨篤念不忘是以御極之年不敢仰方符願歸政讓善

仁皇四謁盛京作賦喬皇高山頌周元鳥歌商

兩陵孺慕六十露霜

帝子謁

陵親帥以行意雖資於頤養志不怠於構堂昔從

皇祖秋獮弓矢今率

嗣皇簡武於此非曰避暑非曰從禽所以練武備而蒐軍實弭  
九邊之生心圍汝螳背之敢怒而凶徒之不就擒哉是故調幕  
謁款要道也述事宏謨達孝也德配乎

天

祖而恩隆於怙冒矣未也今更語汝以

太上皇帝勤政愛民之實焉日幾在心萬幾一日御朝之所敬

書無逸批答封章循名核實召見疆吏無小無大勛爾在公興利除害行宮念微報章是待勤勤者六十拜書丙辰而至再雖歸政而訓政實寶泰以開泰行政用人修刑詰戎罔非

太上皇帝之精神所運量而睿知之昭融也政之大者六龍有方先期告戒毋侈供張畿甸游豫歡聲洋洋津門蒞止水利精詳鷹嘴鹿瞳瀦洩提綱乃鳴和鸞齊魯之疆四巡岱宗遂柴而望西五中一曰不敢康六度吳越八鸞瑯瑯求民之圖江海河防繼禹功而咨度惟嘉謀之永臧治運河以通漕借湖身以爲藏時啟閉以節宣通萬艘以載糧乃籌強弱治淮與黃治清江水在壬午歲遷陶莊之引河遂相繼而葺事乃增卑而易薄塞高家堰之漏卮築石堤於徐州引而長之俾河伯之安瀾仰籌

度之神奇蓋自越火敦牂兒達阿勒坦郭勒而河源灼知故沿其流而宣導無不宜於是錢塘稅駕鹽官問津謀海塘之永固乃周咨其吏人坍漲交乎南北潮汐易乎晨昏經

皇躬之履勘得審圖之更新易柴而石波衝不磷庚子改築堅積雲根甲辰接築長延魚鱗馮夷天吳卻行逡巡費金錢億萬萬以謀東南之民又況豁逋免租行慶施仁若甘雨與甘露隨屬車之清塵汝等或隔以峽江之險或遮以蜀山之奧雖欲奉輶軒與舞蹈因雲日之空瞻嗟長阻夫聲教然而辨涇渭之清濁踰秦棧而考校值荆門之隄決煩屬詞於鳳詔豈得謂黔楚巴蜀爲禹功所不到哉若夫刑尤政之大端自五帝以來未有若我

太上皇帝用刑之愼者也。嘗唐帝之好名疑縱囚而發論駁歐陽之求生亦遠違乎古訓。彼書生之姑息與獄吏之嚴峻皆害德而殺道。豈止辟之明憲惟我。

太上皇帝執一中於堯傳辨三宥於臯問審讞詞於三秋得輕重於五聽。彼周官之精詳入舜察而益進。雖一杖與一笞俾受者之無懟。邇者宥邪教之株連寬軍中之執訊。凡元祀之仁綸皆妙用之懲勸。要無枉與無縱爲兆民而彰信恕。汝昏之自外令剿撫而威振蓋。

太上皇帝之刑期無刑也。兼雷動與雨潤知天討之無私當亦明乎逆順。若夫邦以民爲本民以食爲天。

太上皇帝四推其勤莫春藉田躬秉耒耜爲天下先。木穰金饑。

且賑且蠲三冬粥廠遍哺之饘值青黃之不接又春祺之普便  
卽三登之屢告亦藏富而余畀免糴者再免繆者四全免積欠  
恩尤不易迨內禪之將屆先期而露瀼又一免賦又一蠲糧以  
示

### 太上皇帝暨

嗣皇帝之加惠海內並霑渥而普滂夷考史家凡二十二免漕  
者二君免賦者七帝或半蠲而半征非大惠之攸暨或因災與  
因兵非明恩與美意彼載籍之張皇已疊書於史記孰如我  
太上皇帝之惠孚勿問法乾元之不言所利哉延及新疆澤罔  
不茂被潤澤而大豐美喜並登於仁壽孰自外於覆載若汝罪  
之不宥惟慈母之養驕子暨楚北之稂莠曷不奔走而同太平



乃自斷其項脰且汝撼樹之虬走險之獸亦知我

太上皇帝全武之克張十功之膚奏乎督臣文子實在行閒請  
以我武告爾黔頒我

太上皇帝卽位之初固謂蛇豕不可盡殄荆棘不能盡刪置六  
合之外於不論藉持盈於外患然而泰更包荒謙能伐國驅凶  
衛良溫肅同德惟

天心之默佑實助順而去逆天弧旣張天狼遁跡有準噶爾者  
恃遠與固而睥曰噶爾丹策凌曰策妄阿拉布坦作不靖於邊  
庭干天討於

神算元凶旣誅大兵亦返畧示羈縻不盡刈剗於是達瓦齊乃  
虐其人其人不支

太上皇帝不忍令彼之生靈卽於水火也乃出我師銳兵索倫  
勁旅八旗陟賀蘭而懾之以天威先收烏梁海次撫五集賽再  
納羅斯噶爾藏多爾濟而盡撤其樊籬駭然於將軍之下自天  
上弓不及彀矢不及集而莫不披靡既定準部釋小和卓木之  
縛俾居伊犁而撫舊眾我實大有造於天末矣孰又煽惑曰阿  
睦爾撒納倉卒變生勢不可遏

太上皇帝謀定而動智周而發以直勝詐大兵直達旣挫之霍  
斯庫又殄殄之阿爾楚爾又擊之伊爾洱庫爾淖爾列部景附  
同我澤仇爲除先路通江漢浮莫不震疊雷轟火流大憖授首  
伊犁悉收是役也

太上皇帝豈有所利於土地哉

天助王師有餘刃游二萬里而羸一朝盡收同部準部盡入版圖以耕以種其地最腴雪霽澤生嘉禾登儲乃有金川恃險以狂疆臣未能得其領邊將未能扼其吭

太上皇帝乃習雲梯之技策禁兵之良命相臣而帥之以問罪於西疆斬賊謀以落其膽遂盡拔夫巴郎而莎羅奔空巢徙宅銜璧牽羊矣服而復叛負恩肆虐始則以番攻番繼乃以惡黨惡

帝赫斯怒金鼓遂作疾掃欃槍遍撫部落大兵采入先克美諾直蹴宜喜而破勒烏圍遂巢穴之是薄逆酋走死冥誅膏鉞五年之閒罪人斯得獻馘告功立碑銘績大小金川人我疆域若夫平朱波於天南軼諸葛之渡瀘收猛拱而會新街斷其運道

而殪其渠彼貢其器我奪其幟崇墉動搖妖酋震懾請追藁誅  
爭函貝葉又有莠民恃隔重洋奪亂勑擾弄兵池潢大兵飛渡  
一夕千里只四大戰賊鋒已靡生番熟番及我義民各擒賊首  
獻於軍門用師三月其捷若神惟

帝算之必克迅奏凱於海瀕安南內訌小侯大去栽培傾覆因  
物而付將修矛以申討而阮光平且遣使請罪抒誠矣八旬萬  
壽而阮光平且祝釐來京矣曰君父師長戴照臨請易冠服同  
於內臣龍光飫宴車服寵榮亦有佛國駐錫之林鬼方觀兵之  
地蒙古王公之所皈依我朝

祖宗之覆庇廓爾喀取禍於抗行噶布倫肇釁於牟利

太上皇帝保綏後藏用興戎衣一創之而志懾再躡之而心歸

方青海之初度值朔威之甫移荷

上帝之眷佑乃風日之和怡幕纓君長壺漿迓之效析薪之賤  
役贈良馬之千騎奪兵直前七戰七捷賊乃求赦請附屬國來  
貢其珍免爾斬馘頒金巴瓶以光佛國自此藏中平康正直凡  
此大武無堅不摧極道路之艱阻與山川之嶽嵒每王猷之旣  
奮乃無險之不夷若王倫之卽誅與同咽之就戮則內地之奸  
回功雖偉而不述王者無戰當者皆靡彼強不支汝弱奚恃煥  
乎利害之較然豈告汝而充耳宜告爾長率爾婦子爲我良民  
吾不苛爾若夫

聖學之精天章之富制作禮樂日新富有非汝所知也然而有  
虞干羽苗民以格詎同育於雨露乃盡忘其知識且

太上皇帝壽考作人不分畛域遠及重洋瞻雲就日督臣安敢  
不仰承

太上皇帝同仁之心無外之量而不汝迪耶

太上皇帝首善觀型考古設鐘於是乎建辟雍焉搜輯典墳編  
排竹素於是乎開四庫焉嘉惠海內昌明文學於是乎建七閣  
焉表章微言爛於日星於是乎刻石經焉收羅法物集字道古  
於是乎製石鼓焉此類大端約畧可紀又其繁多不勝屈指